

9a

GEORGII ERNESTI STAHLII,  
MED. DOCT. AC PROF. PUBL. ORDIN.  
*PROPEMPTICON IN AUGURALE*  
**HISTORIAM PATHO-**  
**LOGICAM AFFECTUUM CUM**  
**COXARUM DOLORE SYMBO-**  
**LIZANTIUM HIPPOCRA-**  
**TICAM EXHIBENS.**





*Pinionum commenta delet dies, Naturæ judicia confirmat*; aurea certè est, jam inde ab antiquo tempore, *Senecæ* observatio, & ad posteritatem pulcherrimum elogium, unde insistere laudatissimæ huic virtuti, sub optima atque firma spe, imò certa fiducia, audere possint, quotquot simplex ejus *evidentia*, & inconcussa *constantia*, oblectat. Nempe, quantumlibet notissima sit *metewgla* mentis humanæ, ut semper *levia* potius & *immatura* sectari malit, quam insistere *firmitati veritatis* tramiti: Tantò magis, cum passim etiam *simplicitas* ipsa veritatis, sordere quasi videatur, præ Commen-  
torum quibusdam scitamentis, (quamvis rem rectius æstimando reverà potius *connexio*, quam veritas in rebus distinctis servat, certissimam difficultatem objiciat, ut passim potius *inventiones* illæ sciolæ, præ *veritatis nexu*, non nisi levissimum quiddam fistant & exhibeant.) Manet tamen semper, non solum ipsa Veritas in se, *inconcussa*; Sed etiam hinc inde talia adhuc ejus *testimonia*, ut cum die & tranquilliore animi adversione, omni modo etiam apparitioni atque detectioni ejus luculentiori, aditus pateat. Non patitur tempus, ut hanc rem prolixius per varia specimina stabiliamus; Sufficere potest unum, neque leve aut exiguum, nec etiam ullo merito dubiæ certitudinis, quod desumere placet ex *Hippocratis* annotationibus. Enim verò certò scio, quod quilibet & industrii, & rerum suarum rectè satagere allaborantes, Medici Practici, mecum consensuri sint, quod *Hippocrates*, quæ, tum ab antiquorum *Asclepiadum*, tum à *propria*, diligente observatione annotavit, atque in posteritatis etiam usum consignavit, quicquid simplici quasi *commemoratione historica* complexus est, & satis *disertè* descripsit, non aliter *certum* & *indubium* reliquerit, quam si ex ipso quasi veritatis adyto illud tanquam immediatè emanasset. Ubi verò ad humana commenta, *Speculationes* inquam de *causis* atque *rationibus* harum rerum procedit; aut etiam aliquid tanquam ad formulam ita *præsuppositarum causarum* producit, etiam *historiæ* simpliciiori potius propius habendum: Ibi certè passim talia proferat, qualia antiquiores quidem hinc inde

de



de non sine ingente labore colorare fategerunt: Recentiores autem plerique rariùs agnoscere aut approbare in animum inducunt. Do hujus rei vadem, imò Vatem, prolixum locum, quem commemorat, *Prorrhēt. Lib. II.* proximè finem, sequentibus verbis: *De Coxendicum affectibus ita disquirere (συνέπτεται, oportet.* Quibus Senioribus vehementissimi torpores adsunt, frigescentque tum lumbi, tum crura, pudendumque arrigi nequit, & alvus, nisi coacta, non reddit, feculentusque ac multus mucus excernitur: his morbus erit longissimus: prædicendumque est, annum ut minimum, duraturum morbum, ab eo tempore, quo fieri cœpit, & opem non, nisi Vere & æstate expectandam esse. At verò juvenibus non quidem minus doloris inducit coxendicum morbus, verùm brevior est: nam quadragesimo die liberantur. Sed neque torpores vehementes accedunt, neque admodum frigent crura & lumbi. At quibus hic morbus est in lumbis ac cruribus, neque tamen affligit adeò ut decumbant, considerare oportet, an alicubi sint tumores in coxa; & interrogare, an ad inguen dolor progrediatur. Si enim ambo hæc adfuerint, morbus protrahitur. Interrogandum etiam est, an in femore torpores insint, & ad poplitem progrediantur: & si hoc fateatur, rursus rogandum, an per tibiā ad summum pedem tendant. Qui enim pleraque horum confessi fuerint, his dicendum, crura nunc calida nunc frigida fore. Quibuscunque verò hic morbus in lumbis evanescens, deorsum vertitur, eos confidentes esse jube. At quibus, coxis ac lumbis non relictis, sursum procedit, id grave fore prædico. Quibus autem circa articulos dolores ac tumores oriuntur, ac desinunt, non more podagrico, in his comperies viscera magna, & in urina, id quod desidet album. Et talis si tempora elevaverit, dicet se sæpe dolore; dicet etiam, sudores sibi nocturnos oboriri. Si verò neque in urina subsidet ejusmodi sedimen, nec ei sudores oriuntur, periculum est, ne aut debilitentur articuli, aut abscessus quem favum nominant, sub ipsis nascatur. Fit autem hic morbus iis, quibus in pueritia, & juventute sanguis è naribus fluere solitus desit. Proindè interrogandum est de sanguinis eruptione, an in ju-



ventute facta fuerit: & an prurigines in pectore & in dorso insint. Fit & iis, quibus alvus ingentes dolores excitat citra exturbationes, & quibus hæmorrhoides fiunt: id enim horum morborum principium est. Si verò malo colore sint homines, interrogandi sunt, an capitis dolore conficiantur: hoc enim fatebuntur. Quibus vero ex his alvi dolores in dextris fuerint, dolores his acriores fiunt, & præsertim quum in hypochondrio juxta hepar reliquæ doloris substituerint. His autem doloribus prodest sonus statim in alvo obortus. Postquam autem dolor quieverit, urinam crassam ac viridem mejunt. Atque hoc morbi genus letale non est, verum valde diuturnum. Quum autem jam vetustus fuerit morbus, homines ex ipso cæcutiunt. At de sanguine interrogare oportet, an in juventute fluxerit, & de visus hebetudine, & de urinæ redditæ virore, & de strepitibus, an insint, & oborti profint. Hæc enim omnia fatebuntur. In universis his propositionibus, manifestum est, agere Hippocratem antè omnia methodo historicâ, tam circâ præterita, quam præsentia conjuncta, & ipsa subsequi, (non per rationem æquè, quam per experientiam) solita atque sic tanquam certò prædicenda. Ubi nempe prudenter utique nihil quicquam loquitur de modo causandi, cur tales affectus ita longi & pertinaces sint? Cur alibi sursum, alibi deorsum, tendant. Cur qui sursum, plus, qui deorsum, minus periculi portendere prædici possint, &c. Sed commemorat hæc omnia, ut esse, ut fuisse, ut evenire soleant. Ut verò ex his rebus, utique eliciamus, illud, quod in iisdem simpliciter inesse, & citra ullam additionem, saltem ordinatis ipsis propositionibus, spontè hinc resultare apparebit, ita rem totam velut simpliciter enucleare licebit. Loquitur propriè de *Cœxendicum affectibus*. Primò loco *senes* nominando, rectè indicare, licet tacitè, intelligitur, quod hi dolores *senioribus* familiares esse soleant: Imprimis cum circumstantiis statim allegatis. Non verò simpliciter *annosos* denotare, argumentum mox suppeditat, dum mox *νεανίσκος*, *juvenes* illis contrà distinguit. Quam rem maximè elucidat, *Celsus*, qui tales nominat, qui *quadragessimum* annum excefferint. Dum autem etiam, postquam de



de *Iuvenum* constitutione *Ischiadica* loqui suscipit, mox non solum de *decubitu ad crura*; de obfessione *Lumborum*, imò ad *superiora* conversione, & *viscerum inflatione* seu magnitudine: sed etiam *vehementibus doloribus alvi*, absque ejus *exturbatione*, imò *strepitibus* in ventre, percontari aggressus, quin de *capitis doloribus*, & *pungentibus pruriginibus* in *Metaphreno*: Tunc demum progreditur ad illa, quæ jam *olim*, antequam his talibus obnoxii fierent, illis *familiaria* fuerint, sed CESSAVERINT: Adeoque non tam directè illa ipsa ejusmodi *prægressa*, sed propriè CESSATIONEM illorum, hæc jam præsentia secuta sint. Tandem autem subdit etiam illa, quæ *instare, concurrere, subsequi*, soleant: vbi nempè tam *mucosarum*, quam *sanguinearum*, ex *ano* excretionum, sine *exturbatione*, aut *successu liberaliore*, alvi, meminit. Vbi tandem etiam, postquam asserunt, quod hæc talia iis obtingant, quibus in *pueritia & adolescentia consuetum* fuerit *Sanguinem è naribus fluere*, sed postea *cessaverint*: De hoc interrogandos esse inculcat. Etiam inquit statim, illis hæc evenire, quibus *dolores alvi vehementes* familiares sint: Etiam, inquit, illis quibus *HÆMORRHOIDES γίνονται*, FIUNT. Jam verò obsignat hanc rem disertè: HÆC IPSA ENIM SUNT INITIA HORUM MORBORUM. Liberum mihi certè erit hæc ipsa ad ordinem *Ætiologicum* disponere; ut liberum cuivis, suo quantum placet sensu abundare: quod ita facio. Quibus *pueris & adolescentibus*, *adsue fieri* contigit, *sanguinem è naribus sæpe multumque profluere*; si hæc *evacuatio cessat*, non statim cessant *molimina* quoque: (Et hic ab Hippocrate laudatum τὸ τρέπεσθαι εἰς τὰ ἄνω, illud sursum *vergere, tendere, verti, ferri*. Unde *capitis, Metaphreni, oculorum* (uti denuò interrogare mandat, *an sanguis in juventute fluxerit*) *pathemata*.) *Augescente* autem *ætate*, ad *juventutem* strictè dictam, inter xxv. ad xxxv. annos, *alvum* etiam his affici *doloribus*, circa *Lumbos & Coxas* obstinari *pathemata*, *alvum vehementer dolere*, sine *exturbatione*: quos dolores solvat *repentinus strepitus*, nempè *provolutio flatuum inclusorum*: Tandem *HÆMORRHOIDES FIERI*. Quando hæc ita *deorsum τρέπεται*, vel hæc modo dicta fiunt, ve. protenduntur ipsi dolores adhuc ultrà, per *femora ad poplites*, per *tibias ad pedes*,



*Podagrigo*  $\tau\rho\acute{o}\pi\omega$ : Sin autem desinant hæc talia citrà dolores *podagrici* *hujus tropi* seu moris, quamvis *circà artus*, cum *doloribus* quin etiam *Tumoribus* inceperint, his fiunt *retrocessiones ad interiora*, *inflationes*, imò aliquando *inflammationes*, *viscerum*, quod *Hippocrates* hic *viscera magna* vocat: In antecedentibus nominatim *splenem magnum*. Imo verò fit, in magis ferè adhuc *ad superiora* *vergentibus* hujusmodi commotionibus etiam accidens illud, quos hic *Hippocrates* *nocturnos* vocat, *matutinorum sudorum spontaneorum*. His rebus si jam jungantur *motus tonico-spastici*, tanquam veri *architecti*, aut certè *vectes & instrumenta valida*, hujusmodi  $\tau\rho\acute{\epsilon}\psi\epsilon\omega\nu$ , *fursum* aut *deorsum*, *extrorsum*;  $\epsilon\varsigma\ \tau\alpha\ \alpha\epsilon\delta\epsilon\alpha$ , aut *introrsum*,  $\alpha\delta\ \tau\alpha\ \sigma\pi\lambda\acute{\alpha}\gamma\chi\nu\alpha$ , *conversionum*: Et horum talium *spasticorum motuum contentiones*: Et harum etiam accidentales, *in sensum*, & *stagnationes*, *Energie*: Quin tandem omnium hujusmodi rerum, ab una *asvetudine* *ternè cessante*, progressus *ad novas, locis & modis* (*antiqua autem pertinaci contentione*) *Consuetudines*: Habebitur ita non solum *vera Pathologia*, *conexio*, *conspiratio*, & *mutua dependentia*, quin imò *reciproca conversio*, horum *affectuum*: Sed hæc ipsa quoque, *adeò quoque certa atque firma*, ut ipsi omninò *securè*, qui hic est *totus scopus Hippocratis*, *PROGNOSIN* superstruere, integrum sit: Adeò, ut etiam confidenter *polliceatur*, pro *colophone* totius hujus rei, quod de talibus rebus interrogati, illas certò *falluri* sint, imò simpliciter *elocuturi*, seu *enarraturi*. Hanc certè *Historiam Pathologicam*, uti hic disertis verbis *Hippocrates* memorat, ita proximè præcedentibus etiam pluribus textibus, satis *Parallela* recenset. Imò tam altè *inse-*  
*dit mentem* vel *Hippocratis*, vel *antecessorum* ejus, *Ischiadici doloris propior ratio*, à *partibus & causis hæmorrhoidalibus*, ut revera etiam *Libro de Affectibus*, (licet *materialem causam peculiari illi usitato humori bili cum pituita*, imputet;) *partem* tamen, tanquam *causam conjunctam* *peculiarem*, *nominet* prorsus *inusitatam*, nempè *Venam Hæmorrhoon*, per quam hic humor ita *circà crus* *vagetur*. Has res cum revera nusquam in *opinionem*, sed verè in ipso *facto* ita *existant*, quamobrem nec *Hippocrates*, neque *posteriores*, nec imprimis *Recentiores*, pro vera sui dignitate penitus *perpenderint*, & illis etiam plura talia *Phænomena*, quæ ex hujus modi tanquam *communibus fontibus* *fluunt*, ipso jam etiam *Hippocrate* hinc inde, imò in ipsa hac *sectione*, *suffragante*, *conjungendo*, *veram historiam plenior* ita *absolverint*, & quantum omnes hic *impediverint*, *commenta Crasæ* *humorum*, *neglecto* (a *Recentioribus*) *motu* illorum *translatorio*, *facile* esset *arguere*: Sed *tempus & locus* non sinunt.

Sistere hæc placuit publico, dum sistendus est, & meritorè commendandus publicè, Vir Juvenis egregiè in arte nostrà doctus & exercitatus

DN. JOHANNES CHRISTIANUS  
KUNDTMANN,

Vratislaviâ Silesius, Medicinæ Candidatus dignissimus.



Natus hic est Vratislaviæ, notissimæ celebritatis Metro-  
poli Silesiæ. Patrem habuit Virum Amplissimum DN.  
JOHANNEM SAMUELEM KUNDTMANN,  
Præfecturæ Vigiliarum Prætorianarum Locum tenentem:  
Matrem foeminam honestiss. REGINAM ROTHE-  
RIAM. Fuit autem KUNTMANNORUM nomen  
etiam jam pridem in Saxonia maximè secundæ famæ, ubi  
Proavus Nostri, D. SYLVESTER KUNDTMANN,  
Serenissimi JOH. GEORGII II. Archiater, doctis et-  
iam scriptis celebris, vixit: Avus autem M. JOHAN-  
NES KUNDTMANN, Holdenstadii Pastor vigilantis-  
simus fuit. Horum Parentum probissimorum, post edu-  
cationem honestam, cura fuit præcipua, ut bonis litteris &  
artibus, capax imprimis ingenium filii, optimè excoleretur.  
Quem in finem eundem demandaverunt dexterrimæ pariter  
atque fidelissimæ institutioni, post domesticos Præceptores,  
Clarissimorum Magdalenæi celeberrimi Gymnasii deinceps  
Rectorum, B. DN. GRYPHII, & DN. KUPFFEN-  
DERI: nec non DN. POLII & DN. TI-  
TII, quos omnes gratâ mente, honoris causâ, nominat.  
Postquam autem etiam jam illo tempore, Medico imprimis  
studio animum adjiceret, & brutorum anatomicæ sectioni  
operam adhibuisset, maturus tandem Academicis etiam stu-  
diis judicatus, cum ipso anni MDCCV. auspicio, Illustrissi-  
mam Regiam VIADRINAM adiit: mox tamen inde ad  
hanc Regiam FRIDERICIANAM transiit. Ubi quidem,  
privatissimè, universum Cursum Philosophiæ, laudabili peni-  
tus studio, prosequi suscepit, & apud Excell. DN. D.  
GUNDLINGIUM, historiam litterariam commemora-  
ri audivit: nec non publicis lectionibus Magnifici hodie  
Pro-Rectoris & Consil. Int. Sax. DN. THOMASII, au-  
scultavit. Pro scopo verò suo directo, omnibus, quæ à Pro-  
fessoribus Ordinariis proponebantur, Collegiis, prorsus as-  
siduum auditorem se exhibuit. Unde apud Excell. DN. D.  
HOFFMANNUM, Collegium Physicum curiosum, et-  
iam bis; nec non Geographicum Physico-Medicum, Chy-  
micum experimentale, Com. in materiam medicam, Casus fo-  
ren-



renses Medicos, & Ideam Medicinæ, audivit. Meis autem etiam Collegiis, de usu Anatomix Physiologico-Medico, Chirurgico-Medico, Physiologico, & publicis Lectionibus errores hodiernorum Physiol. ostendentibus, Pathologico quoq; Therapeutico, Practico-Dogmatico, & Chymico verè experimentali, nempe experimentorum rationes solidas, pariter experimentales, sustenti, cum summa assiduitate interfuit. Quin etiam proprio adhuc tempore, Panto-mathematicum Excell. *CHRISTIANI WOLFFII*, Mathem. P.P. celeb. unà cum pluribus aliis, percepit. Tandem ad ipsam Praxin transferre gestiens, quæ ita varia atque plurima percepit, & sibi ipsi in posterum sufficere confidens, petiit à Facultate nostra, ad consveta examina admitti, in quibus egregios profectus exhibuit. Non statim inde ad ipsam disputationem progredi potuit, oblatâ sibi, in primis desideranti, occasione commoda, metallifodinas, præcipuè Hercyniæ Sylvæ, tum etiam Mansfeldicas, perlustrandi, & universas ibi usitatas operationes circa metalla, perspiciendi. Excurrit autem, invitante occasione, etiam ad ipsos Batavos: ubi Amstelodami, Medicos Celeberrimos, *COMMELINUM*, *RUYSHIUM*, & *RAUW*, quamvis per breve tempus, audivit, exotica, anatomica curiosa, & Chirurgica, exhibentes. Neque vero tacendum, quod peculiari fato, suis oculis conspexerit non solum verum effectum transmutationis ignobilis metalli in purum aurum, exigui pulvilli injectione, citò perpetratam: Sed etiam duarum propemodum unciarum hujus ejusdem, ex largitione artificis, particeps factus sit. Peragratis porro præcipuis Belgii Civitatibus, & ipso etiam campo, in quo pridie ejus diei victoria de Gallis reportata fuerat, proxime Audenardam: quin etiam, in tranquillis à Bello locis, sicariorum latrocinio vix fideli monito præreptus, sextum post mensem ad nos reversus, nunc ultimum solenne specimen edere constituit, DISSERTATIONE INAUGURALI de REGIMINE. Ad quem actum solennem SERENISSIMUM PRINCIPEM SAXONIÆ Magnif. Pro-Rectorem, reliquosque Illustrissimos, Illustres, Maxime Reverendos, Excellentissimos, Generosissimos, Nobilissimos atque Doctissimos, Academiæ nostræ Proceres, Fautores, Cives, pro officii ratione, cum omni honore debito atque observantia invitamus. P. P. Halæ Magdeburg.

d. XXV. Sept. MDCCIIIX.

(L.S.)